

IL SÎT DE ARLEF, PLUI SERVIZIS AI ENTS LOCÂI E GNOVIS PAI ZOVINS

Udin, ai 12 di Jugn – Plui multimediâl, cun servizis e struments gnûfs, interessant une vore ancje pai fruts e pai fantats.

Lis implementazions dal sît de ARLeF-Agjenzie regionâl pe lenghe furlane presentadis vuê te sede de Regjon a fasaran diventâ il portâl un strument di scuvierte autentic par cui che il furlan lu cognòs ancjemò pôc, ma ancje di interazion par chei che – tant che i operadôrs dai ents publics – a àn necessitât di traduzions e di consulencis.

Il sît www.arlef.it, dal dut bilengâl, cun di fat al met a disposizion cumò un servizi di traduzion dal talian al furlan pai ents locâi, che a podaran ancje domandâ on line il control de segnaletiche stradâl in "marilenghe".

Slargjade ancje la sezion comunicazion cuntun spazi di pueste dulà che si pues "disfueâ" dutis lis pagjinis cui articui par furlan publicâts su la stampe cuotidiane e periodiche.

Par comunicâ in maniere plui facile cui zovins il sît al à simpri atîfs i colegaments su Twitter e Facebook, dulà che, plui voltis al dì, al da gnovis su lis ativitâts che a rivuardin il furlan sul teritori locâl e su lis ativitâts di altris minorancis linguistichis.

"O crodìn che al sedi just doprâ plui che si pues lis tecnologjiis e i canâi gnûfs di comunicazion par promovi la lenghe furlane e par chest cumò la Agjenzie e je

presinte tai social network", al à dit il president de Agjenzie, Lorenzo Fabbro, marcant ancje cemût che "cumò il portâl al ufrìs in plui rispjet a prime une schirie di contignûts e produzioni audio e video che dispès si fâs fadie a cjatâ ma che a son une vore utii e interessants ". Al è il câs, par esempi, dai materiâi pe didatiche, ma ancje dai video, dai cd e de musiche.

Il sît, che pe part tecniche e grafiche al è curât simpri de agenzie udinese direWeb – vincidore adun cu la ARLeF di premis nazionâi tal setôr dal web -, nol trate dome de ativitât davuelte in maniere direte ma al devente ancje vetrine di dut ce che si fâs di impuartant pe lenghe e in lenghe furlane.

"Sore che cjariâ i servizis istituzionâi de ARLeF – al conferme Fabbro – o vin domandât materiâi al Ateneu furlan, a associazions e a produtôrs independents: ognidun di chescj contribûts al è compagnât di une schede tecniche. O volìn cussì valorizâ e fâ cognossi chest lavôr prezios ".

Une part gruesse e je dedicade ae infanzie, cun cartons animâts e altris sezions di interès didatic. "Tal mê di Setembar – al à anticipât Fabbro adun cul diretôr William Cisilino – o ativarìn une sezion specifiche dedicade ai neogjenitôrs, cun scrits, video e un blog gjestît di une esperte tal cjamp dal bilinguism".

ARC/EP